

IN DECRETVM ROMANÆ
INQUISITIONIS DE AVTORI-
TATE PRINCIPVM APOSTOLORVM
Petri & Pauli NOTATIONES.

I.

IN hoc Decreto illud primum animaduertendum, propositionem libri de Frequenti Cōmunionē, SS. *Petrum & Paulum duos esse Ecclesiæ Duces & Principes qui vnicum efficiunt*, Iesuitarum criminationibus tam acerbè atque inuidiosè appetitam, non modo non damnari, sed absolui & probari, cum in solam eius explanationem aliis libris propositam Censores incumbant. Non enim Petrum & Paulum duos Ecclesiæ Principes qui vnicum efficiunt, simpliciter dici, sed *omnimodam inter eos aequalitatem* adstrui vetant. Vnde patet atroces illas vociferationes quibus Iesuitæ ore ac scripto, clam & publicè propositionem illam vexarunt, soli quam in hoc omni negotio exhibuerunt cupiditati ac malevolentiae ex hoc Decreto adscribendos.

ii.

Præterea, si verba ipsa quibus Decretum constat, attentius spectes, ne in libros quidem ad propositionem illam explicandam tuendamque editos valere videtur, cum eam duntaxat explicationem, quâ omnimoda inter summos illos Apostolos æqualitate inducitur, respuat. A qua explicatione libri illi sic abhorrent, ut contrarium manifestissimè doceant. Petri siquidem supra Paulum in illa à Patribus tradita æqualitate prærogativas integris capitibus exponunt, priorem honoris locum Petro addicunt, eique, teste Chrysostomo, ut præcessori, fratrique maiori debitam à Paulo observantiam &

A

Case
F
39
.326
1647a

De Ampli-
tudine Ec-
clesia Ro-
mana lib.
4. c. 24. §
25.

reuerentiam docent. Quin & disertè aiunt, *Ecclesiam in Petro præcipue fuisse fundatam, ita ut electio Pauli electione Petri niteretur. Itaque quod Iudæis ad Gentiles autore Paulo, hoc idem Petro ad Paulum ipsum gloriari licuisse: Non tu radicem portas, sed radix es.*

Denique Pauli potestatem *extraordinariam*, & extraordinario quodam modo constitutam, Petri autem simpliciter & absolute ordinariam agnoscunt. Ex quibus perspicuum fit, non *omnimodam* inter duos Apostolorum Principes *æqualitatem* ab illis fingi, cum eos tot modis inæquales fateantur.

III.

Ipsi Iesuitæ, illorumque affectu, explicationem istam à libris quos tot factionibus & fraudibus adorti sunt, alienam probè sentientes, cum nouum Decretum Gazetarij, ut vocant, præconio honoris causâ publicandum censuissent, vocem illam, *omnimodæ æqualitatis*, eradendam viderunt: veriti nimirum, ne apud Gallos, qui melius aliquantò quam Romani gallicè sciant, Inquisitio circumuenta, & ad libros ob ea quæ non docerent circumscribendos damnandosque malignè inducta videretur.

IV.

Facilius multo fuit librorum illorum damnationem ab iis per fucum auferre; à quibus nec lectos constat, nec verò legi potuisse, quippe lingua ipsis ignota conscriptos. Cum enim tota de qua agitur doctrina libro de Romanæ Ecclesiæ amplitudine gallicè scripto contineatur, Epistolâ latinâ ad Pontificem, Patrum testimonia strictim & obiter, atque ita breuius & obscurius, quàm ut eorum vis & sententia plane percipi queat, delibante: constat ex omnibus qui iudicio interfuerunt vnum fuisse qui gallicè sciret, eumque ipsum hac scientia quasdam ob causas non magnopere adiutum. Ut ergo antiquus Ecclesiæ mos à summis potissimum Pontificibus obseruatus retineretur, Libros ante omnia, ut Iudices quid

ageretur, scire intelligereque possent, latinè vertendos curari oportuit, quemadmodum in Librorum à Iesuitis Anglis editorum Censura ab illustrissimis Galliæ Antistitibus egregiè præstitum. Hoc vero fundamento prætermisso, quam proclive fuerit censoribus illudere, & qualibet Iesuitarum arbitratu obrudere, nemo non videt.

V.

Quod quidem quo commodius fieret, iidem actores Iesuitæ atque iidem Iudices fuere. Ut enim taceam Cardinalem Caraffam Iesuitarum Generalis præpositi fratrem, & Cardinalem Lugo Iesuitam, quem de omnibus grauioribus negotiis ad Generalem suum referre obedientiæ votum etiamnum cogit: inter Theologos Censuræ concinnatores aderant duo ipsissimi Iesuitæ, iisque adiuncti quatuor aut quinque alij, qui cum propositione quæ ventilabatur scripto impugnata accusatores se prodidissent, ob id ipsum confessu illo digni sunt visi, summotis aliis eruditione spectatis viris, quod ad exploratissimam veritatem propensiores viderentur.

VI.

Cæterum hanc causam illud in primis illustrat, quod ab hinc duobus circiter annis Censuram similem Cardinalis Spadæ, cuius in Inquisitionis tribunali præcipua potentia auspiciis confectam, sic ab omni probabilitatis specie abhorrentem omnes putarunt, ut suppressendam atque obruendam censuerint, ne Iesuitis quidem facta eam describendi potestate, propterea quod Pontificis grauiores quique ac sapientiores ministri nihil ex eo nisi Apostolicæ sedis labem sperandum intellexerent. Cum vero postea hoc vnum acciderit, ut doctrina de qua agimus antiquæ Traditionis testimoniis posteriori Libro de Ecclesiæ Romanæ amplitudine firmior munitiorque sit facta, & eruditissimorum deinceps tum Parisiis, tum Romæ virorum assensu, qui etiam nunc manet, probata, hoc plausu Cardinalis Spadæ stimulatus impensius atque incensus est animus.

Itaque existimationis vindicandæ studio coitione cum Iesuitis facta ad priorem censuram è tenebris iustissimis eruendam atque in integrum restituendam exarsit. Cuius animi æstum tantum fuisse Diana ipse suo in libro est testis, vt Cardinalem Contarenum Collegij Cardinalium splendidum lumen obscurare aggressus sit, egregium Casuistam adducens vt crederet, eruditissimi Cardinalis librum quo summi Pontificis Primatum aduersus Lutheranos propugnauit, à Tridentino Concilio repudiatum : quod perspicuum eius de communi Petri & Pauli primatu testimonium aliter effugere & cauillari non posset.

VII.

Præcipua Cardinalis istius & Iesuitarum ars fuit, summo Pontifici, iisque qui illi adsunt ad insignem Gallici nominis contumeliam persuadere conari, hisce libris schismati viam sterni, & ad alterum Pontificem quem Gallica aula cuperet creandum, aditum parari. Has esse Cardinalis Richelij machinationum reliquias: atque hinc libros exercitu nostro primum in Italiam irrupente in lucem emissos, vt ad nouandas perturbandasque Ecclesiæ res animos commouerent: Denique omnino metuendum, ne Galli nunc vbique victores occultam aliquam quæ suo tempore eruptura esset, perniciem molirentur. Ita politicis magis quam Ecclesiasticis ac Theologicis momentis expensa res ac librata. Ac mirandum profecto Iesuitas, dum eos quos horum Librorum autores putant, apud Gallicanæ aulæ procures omnibus artibus in odium adducere conantur, iisdem apud Romanos inuidiam creare tanquam in Galliæ aula factione valeant, cum eaque conturbandæ Ecclesiæ occulta consilia inierint.

VIII.

Talibus initiis consentaneum fuit, vt auertendæ maioris quam vellent lucis causa Doctores ac Theologos Parisienses Romæ degentes, qui se ad dubitationes

quascumque soluendas diluendaque obiecta non semel obtulerant, ne audiendos quidem censuerint, nec vlla eorum quæ gereretur cognitione dignandos, quod ferre id negarent Inquisitionis leges, quæ inauditis iis quorum res agitur, pronuntiare consueuerit.

IX.

Quis vero non stupeat Iesuitas Decreti huius auctoritatem nobis sanctam esse velle, qui similia Decreta toties ac nuper grauissimis in rebus aspernati sunt. Sic censuram qua Rabardæi liber schismatis ac hæreseos nota Inquisitionis iudicio iniustus fuit, ita exceperunt, ut ad Academiæ Parisiensis Apologiam, *ab extranea potestate* eam manasse responderint. Sic Baunij libris ab eadem Inquisitione proscriptis Religiosus ille Pater scripto typis edito, quod etiamnum extat, exclamare non metuit: *Quid Censura Romana cum Gallica?* Sic ubi Cellorij de Hierarchia volumen, quem Societatis potius quàm priuati hominis fœtum esse constat, Romæ damnatum fuit, non modo Censuræ nihil honoris habuerunt, sed ad illius dedecus nouis Patrem illum honoribus auctum Collegio Flexiano Rectorem continuò præfecerunt. Iampridem enim experienciâ perspectum est, edita ac decreta, quæ ipsi quantum ad se attinet, flocci faciunt & rideant, cæca quadam ab aliis obseruantia suscipi velle, eorum aspernandorum potestate sibi seruata.

X.

Quod sane majus etiam videbitur, si tria hæc expensa fuerint. i. Iesuitarum libros Inquisitionis Censura damnatos dogmatibus adeo scædis & enormibus scatere, ut non ab illa modo perstricti sint, sed & Illustrissimorum Galliæ Episcoporum calculo proscripti, quod *doctrinam nouam, temerariam, falsam, perniciosam ac seditiosam, ad Apostolica Sedis auctoritatem infringendam, schismataque ac dissidia in Ecclesia ferenda spectantem contineant*: quodque nominatim Baunij opera homines ad pro-

iestam peccandi licentiam morumque prauitatem duce-
rent, naturali aequitate ac iure gentium calcato. 2. Iesuistas
 Romæ factionibus & fallaciis tantum posse (quod non-
 nulli Pontifices etiam intellexere, dum hanc ob causam
 Generalem illorum Præpositum aliud amandare cogita-
 runt) vt si quis eorum liber damnatus illic fuerit, eum in-
 signi quadam prauitate & dogmatibus nullo fūco dissi-
 mulandis horrendum esse oporteat. 3. Iis Inquisitionis
 iudicium qualecumque tandem fuerit recusare integrū
 non esse, quod ad vniuersa quæ Romā afferuntur, cæca
 obedientia amplectenda singulari sese voto obstrin-
 xerint. Quæ omnia secus se habent in hac causa. 1. enim
 libros de quibus agitur, vt primum editi fuere, erudito-
 rum omnium nulla cupiditate aut præiudicio impedi-
 torum mira suffragatio & gratulatio consecuta est. Quos
 etiam postquam Decretum istud Lutetiæ sparsum est, in
 sententia mansisse constat, nec alio dolore cōmotos, nisi
 quod Apostolicæ Sedis nomine ita quibusdam abuti li-
 citum esset. 2. Horum Librorum autores non solum ni-
 hil præsidij Romæ inuenisse, sed per istam Iesuitarum
 factionem & potentiam tam acerbè habitos, vt eorum
 patronis omni dicendi potestate erepta, libri etiam ne
 lecti quidem damnati fuerint, quo vitio nullum in iu-
 dicando maius, nullum apertius suscipi potest. 3. Deni-
 que autores illos nullis Iesuitarum votis obligatos in
 communi Galliæ iure consistere: in qua vulgo notum est
 Inquisitionis edicta non agnosci, neque vllam vim no-
 uorum etiam Theologorum sententiā habere. Nec ta-
 men in Ecclesia Gallicana tenuius, atque haud scio an
 amplius & sincerius, quàm vsquam alibi, Apostolicæ
 Sedis colitur autoritas. Sed cum Inquisitionis Iudices
 formulis ac regulis admodum extraordinariis & com-
 muni Ecclesiæ iuri minus consentaneis vtantur, metuen-
 dum non sine causa visum est, ne paulo facilius circum-
 uentiantur (quod etiam Summi Pontifices sæpius con-

questi sunt) neue imbecilliores atque omnis illic opis
egeni potentiorum vi aut gratiâ opprimantur.

XI.

Cum ex hoc ipso Decreto pateat, quod supra item di-
ximus, propositionem libri de Frequenti Communione
per se atque vt in eo extat, sanam esse, & ab omnicensu-
ra alienam, ab atrocissimis Iesuitarum, eorumq; affec-
tû crimationibus haud dubie vindicari eam oportuit.
Quæ disceptatio sola necessitate & aduersariorum im-
portunitate suscepta non aliter ex Catholicorum vero-
rumque Theologorum officio tractari potuit, quam vt
summa cum fide, quid in Sanctorum Patrum, Pontifi-
cum, & Conciliorum monumentis ea de re inesset, ex-
poneretur. Atque id vnum in iis libris agi plerisque lo-
cis significatur, vbi apertè scriptum est, nihil aliud specta-
ri, nisi vt Pontificum ac Patrum testimonia integerrima
fide referantur: vt qui grauissimam, sanctissimamque in
Ecclesia auctoritatem, quæ est summorum Pontificum, Pa-
trum, ac Conciliorum aliquo venerationis sensu prose-
quantur, statuunt num eorum sententiis plus fidei tribui
equum sit, quam Censorum nostrorum commentis, qui sibi
illarum non modo respuendarum, sed damnandarum etiam
& perniciosis erroribus annumerandarum potestatem
arripiunt. Denique passim denuntiatur propositum esse
autori solius facti quæstionem explicare, prolatis San-
ctorum Patrum sententiis, itaut scriptor Epistolæ ad
summum Pontificem Innocentium X. his ipsis verbis
Sanctitatem suam compellet: Si enim Patrum illorum ef-
fata minus fideliter à me descripta non criminose iacta-
tum ab aduersarijs, sed vere probatum fuerit, quicquid
eiusmodi in hoc libro eruditorum & Ecclesiasticæ Tradi-
tionis de qua sola hic agitur, peritissimorum iudicio repe-
ritur, & ipse iam damno, & a S. V. omnibusque Christia-
nis damnari ac repudiari non recuso, sed expeto vltro ac
postulo. Ex quo manifestum est hoc vnum Scriptoris

De Ampli-
tudine Ec-
clesiæ Ro-
manæ. lib. 1.
c. 1.

Epist. p. 77.

illis culpæ ascribi ac censura notari potuisse, eos testimoniorum ab ipsis illatorum sensum aut verba corrupisse. Qua de re cum Decretum nihil pronuntiet, ne quidem post commemoratam testimoniorum ab iis congestorum vberimam copiam, fidei illorum integritatem potius agnitam, quàm dubiam suspectamue fuisse significat.

XII.

Hinc liquet hæreseos notam quam Decretum istud irrogat, cum in libros quos nominat cadere non possit (quandoquidem in aliorum sententiis verbisque referendis falsi crimen suscipi queat, non hæreseos) in Sanctos ac Patres vniuersam recidere. Hos enim solos doctrina Libris istis proposita ita perspicuè autores habet, ut iis impositum vel affectum quicquam fuisse ne Censores quidem queri ausi sint. Quapropter valde metuendum, ne Decretum hæreticorum attollat animos, fideliumque conturbet, cum Sanctos Patres vniuersamque Ecclesiæ Traditionem damnasse videri possit: quo malo vniuersa Catholica Religionis fundamenta corruerēt.

XIII.

Quam suspicionem magnopere adiuuant Theologi, qui huic iudicio interfuere, quorumque ex scriptis Censuram expressam constat. Ita enim testimoniorum allatorum vim & lucem viderunt, ut eorum nonnullos auctores, atque in iis eruditissimos ac celeberrimos Cardinales Cuzanum & Contarenum ultro inuadere, ac proinde hæreseos insimulare coacti sint, quippe doctrinæ quam ea nota dignati sunt assertores. Patrum autem ac summorum Pontificum clarissimas voces tam abiectis ac puerilibus & ab omni rationis ac probabilitatis specie alienis effugiis & cauillis eludere sunt aggressi, ut eo ipso inuictam clarius veritatem quàm vel aperta confessione demonstrauerint.

XIV.

Quod ut paucis exemplis doceatur: Ad Patrum &

scriptorum Ecclesiasticorum autoritates euidentissimas quibus traditum est summos Pontifices nō minus Pauli successores esse quā Petri, idque eos ipsos summo honori ducere, hanc illico distinctionem ex intimo artificio depromunt: *Successione impropria, Concedo: successione propria & perfecta, nego.* Cum Petrum & Paulum in eiusdem loci primatu coniunctos audiunt, vt Cardinalis S. Georgij Bonifacij viij. nepos in opere in Italia edito, atque in Patrum Bibliothecam relato loquitur, omnem splendidissimi testimonij lucem hac vna vocula obruisse sibi videntur; *In primatu predicationis, Concedo: in primatu autoritatis, Nego.* Denique vbi summos Pontifices sibi oppositos vident, qui duorum Principum Apostolorum sese heredes pariter ac sine discrimine profiteantur, exultant, atque vt eorum lepidissimis verbis vtar, *magnum festum faciunt* hac distinctiuncula: *Sunt heredes S. Pauli in eminentia scientia, Concedo: in eminentia autoritatis, Nego.* Vnde consequens erit, vt si quem summum Pontificem Theologum non maximum esse contingeret, is Petri non Pauli futurus sit heres: nec ei vtriusque Apostoli autoritatem vsurpare in Bullis liceat, cum alterius illum hereditate scriptores isti deiecerint. Quis ferat summorum Pontificum splendidissima oracula talibus offuciis ac nugis illudi, quibus nihil aliud effici queat, quā vt sanctissima in terris autoritas hostibus Ecclesiæ spernenda atque irridenda propinetur?

XV.

Iam vero in hoc Decreto illud omnium pessimum inest, quod vniuersam sacræ Antiquitatis doctrinam perturbat & miscet. Quid enim procliuius, quā vt homines minus periti hæresin in posterum putent, si quis dicere cœperit cum Irenæo, Epiphanio, totque aliis Patribus ac Pontificibus Apostolos Petrum & Paulum ambos *Romana Ecclesia fundatores, primos Episcopos &*

ita vniuersæ Ecclesiæ Principes? Hæreticum fore, qui cum Ambrosio, *Paulum Petrum non inferiorem, sed æqualem* affirmet? Hæreticum fore, qui cum Chrysostomo, ac multis aliis, *Paulum Ecclesiæ primatum obtinuisse* asserat? Hæreticum fore, qui cum Ioanne VIII. summo Pontifice non scientiam Pauli solam, ex nouorum Censuræ patronorum fictili glossemate, sed & Pauli *autoritatem* non minus quam Petri *in Apostolica Sede etiamnum viuere* contendat? Hæreticum fore, qui cum Innocentio III. Pontifice, *non in Petri tantum, sed & in Pauli persona Romanam Ecclesiam super vniuersas Ecclesias auctoritatem accepisse* pronuntiet? Nonne quisq; facile cogitauerit, si Librorum, qui in his Pontificū & SS. Patrum propositionibus exponendis toti versantur, doctrina hæresibus accenseatur, propositiones illas continuo eiusdem hæreseos esse damnandas? Quod èd sane verisimilius fiet, quia ipsi illi Theologi qui Censuræ conficiendæ præfuere, sic illam libris editis tuentur, vt in propositiones istas audacissimè impetū faciant, quasi priuatorū sint quos refellere conantur, non SS. Patrum, quorum illi sola verba descripserūt. Quænam vero perniciēs in Ecclesiam maior inuehi possit, quàm vt dogmatum à Pontificibus & vniuersa Antiquitate constantissimè traditorum friuolis captiunculis, distinctionibusque ludendorum cuius licentia pateat, atque ita vniuersa Religio impiorum atque Atheorum contemptū ac ludibrio proiciatur?

XVI.

Ergo nihil aliud Decreto isto effici potest, quàm vt Apostolicæ Sedis obscuretur gloria, frangatur autoritas, conturbatis fidelium mentibus atque in ancipiti relictis audiendumne sit potius Romanæ Inquisitionis edictū, quàm tot Romanorum Pontificum, Patrum & Conciliorum disertissimæ clarissimæq; voces. Ex quo metuentum esset, ne tanta in Apostolicæ Sedis regimen inuidia redūdaret, vt ne infestissimi quidem hostes perniciosius

ei quicquam optare possent. Hinc dictitari jam cœptū, minus mirū videri debere, quod Iesuitæ in vulgus spargere audent, librum de Frequenti Communione ab Inquisitione damnatum: propterea quod qui doctrinam Romanæ Sedi honorificentissimam Romanorum Pontificum, Cōciliorum, ac Theologorū tum veterum tum recentiorum testimoniis munitissimam hæreseos notā inurere non dubitauerint, nihil iam in Ecclesia tam verum, tam illustre, tam inuiolatū habituri sint, quod non eadem ratione percellant atq; opprimant: & qui Ecclesiæ lumina atque ornamenta in tanta re pro nihilo duxerint, eorum in alio libro qui eos solos loquentes docentesq; similiter inducit, maiorem rationem habituri non videantur. Nec vero amplissimo tot Episcoporū ac Facultatis Parisiensis Doctorum choro, qui librum illum Approbationibus laudibusque eximiis cohonestarunt, conquerendi locus foret, plus sibi honoris in hac causa non habitum, quam sanctissimis Ecclesiæ Episcopis ac magistris.

XVII.

Præterea Decretum istud Parisiensi Facultati non leuem maculam aspergit, dum Librorum jampridem ipsa inspectante nec vlllo modo reclamāte Parisiis editorum doctrinam hæreseos nota omnium grauissima compungit. Hinc enim colligi facile poterit, aut Facultatem vniuersam in dignoscendis hæresibus minus oculatam esse, quàm Dianam, De Bellis, præclarosq; istos Theologos à quibus compositam Censuræ formulam Decretum testatur (quod ne ipsi quidē existimari velint, & qui secus sentiāt, ipsa lucubrationum eorum inanitate ac futilitate facile refellantur:) aut eandem Facultatem hæreses quarum probè conscia sit, turpiter dissimulare ac probare silentio, & eas quidem hæreses quibus Apostolicæ Sedis auctoritatem profigari contendūt. Quo crimine grauius etiā dedecoraretur toto orbe celeberrima Facultas, cuius

in primis zelus ac vigor, in erroribus hæresibusq; confodiendis semper enituit.

XVIII.

Atque hoc eò magis animaduertendum, quod cum primum Scriptū in lucem prodit, quo doctrina de quā agimus proposita magis quam explicata & ad omnium intelligentiam enucleata fuerat, Iesuitas cōstat aduersus illam inuidiæ tempestatem concitasse, omnia miscuisse, Ecclesiæ ac Regni proceres cōmouisse, hæreseos certissimæ ream & proximis Facultatis comitiis proscribendam ubiq; iactasse. Sed non minus hac in causâ quam in ple-risque aliis Facultas nobilissima docuit turbis eiusmodi ac tumultibus, quibus cupidi homines vsquequa; diffusi certissima quæq; dogmata obruere atq; infamare conantur, leuioribus tantum atque imperitioribus animis captandis esse accōmodatas: ingentemq; illam testimoniorum vim ad doctrinæ tam iniquis artibus oppugnare patrocinatorum congestorum, priuatis potius docendis necessariam, quàm sibi, quæ ipsam per se veritatē in Ecclesiasticæ Traditionis fonte perspexerit. Quod si ad eā cum vulgo minus nota esset, solitisq; aduersariorū fucis ac fraudibus in omnium odium vocaretur, vel leuissimè violandam nullo pacto adduci potuit, multo etiam longius absuit ab ea vellicanda, postquam posterioribus Libris tanta vbertate, tanta vi ac robore assertam & vindicatam vidit, vt etiam qui de primo omnium scripto minus commodas cogitationes sibi inmitti passierant, ipsa irruentis in oculos veritatis luce conuicti, tantæ auctoritati libentissimjs animis paruerint.

XIX.

Itaque Iesuitæ propositionis huius in Parisiensi Facultate infringendæ omni spe abiectâ, quod Lutetiæ nō potuere, Romæ exequi conati sunt. Atque vt summi Pontificis ministros luderēt, æqui uocis & captiosis more suo vocibus prædicare cœperunt, Facultatē Parisien-

sem libros de indiuidua autoritate SS. Petri & Pauli nec approbasse nec approbadorum potestatem dedisse (quod & nuper in Gazetam totidem verbis transferendum curarunt) vt videlicet Librorum doctrina repudiata, illiusque approbandæ potestas negata à Facultate fuisse videretur. Atqui constat nec Facultatem Parisiensem vniuersam libros approbare consueuisse, nec vllius approbandi licentiam, nisi rogetur, concedere. Eam autem licentiam hîc quidem rogauit nemo, propterea quod auctor ob causas prudentium omnium iudicio æquissimas nomen suum inscribendum non duxerit, satisque approbationis habere videbantur assensus & plausus quibus eruditissimus quisque de Facultate veritatem excepit, maxime postremo Libro expositam quo nebularum omnes reliquæ, quæ minus intelligentium oculis officere potuissent, ita diffusæ sunt penitus ac disiectæ, vt aduersariorum selectissimi, quorum in nouam inauditamque illam hæresin acerrimi impetus metuendi videbantur, nihil habuerint quod obtenderent post septem vel octo mensium moram præter solas nouem aut decem obseruatunculas, quas continuò validissima confutatio, gratulantibus omnibus, obtruiuit.

XX.

Nec vero folius Parisiensis Facultatis honor agitur, sed multo etiam maior vniuersi Cleri Gallicani, qui Parisiis plus anno congregatus dum doctrina, quam hæreticam vocant, in vulgus exiit, ita non reprehendit vel aduersatus est, vt comprobarit potius & suffragatus sit insignium prudentia & eruditione Præsulum iudiciis & laudibus, qui hanc animi sui sententiam, non priuatis duntaxat, sed primariis Regis ministris, atque ipsi illustrissimo sedis Apostolicæ Nuntio professi sunt. Quod si nouo quodam dogmate, nedum hæresi emergente, Episcopos siluisse consensisse est, Canonum Sanctorumque Patrum iudicio, quanto fœdius fuerit, encomia insuper & elogia contulisse?

Singulari prudentia & eximio erga sedem Apostolicam studio quidam præditi non potuerunt non mirari, minus prospectum fuisse à sagacissimis hominibus quid incommodi ex hoc Inquisitionis Decreto in posterum oriri posset. Cum enim de B. Pauli ad Põtificiam dignitatem iure sententiam ferre non dubitarit, eam sibi auctoritatem sumere videtur, vt quicquid deinceps controuersiarum in eo genere extiterit, diiudicet ac definiat. Ita si cuius forte Pontificis electio in dubium veniet, vel si plures de Pontificatu inter se contendent, vt sapius accidit, arbitrium iudiciumque legitimum penes Inquisitionem erit, neque illius sententiæ Christiano orbi respuere integrum erit, quæ pari in causa non de vulgarium hominum iure, sed de ipsorum Ecclesiæ Romanæ Fundatorum dignitate, quos summi Pontifices vniuersi prædecessores ac parentes agnoscunt, pronuntiari. Quæ res quanti periculi sit, quantamque perturbationem ac tempestatem in Ecclesiam Romanam inuehere possit, nemo non videt.

XXII.

Denique vix capere se plerique aiunt tantum valere potuisse apud cordatos vllos Iesuitarum artes ac præstigias, vt obiecta sibi falsi erga Põtificem obsequij specie, eam doctrinam illius auctoritati contrariam censuerint, quæ vna omnium ad illam stabiliendam maxime facit. Tam enim luculenter demonstratum est ad tuendam Ecclesiæ Romanæ amplitudinem prorsus necessarium esse, quod à perpetua Ecclesiæ Traditione de Beatissimorum Apostolorum Petri & Pauli eodem apice honorisque summi vñitate accepimus inuiolatum seruari, vt hoc semel posito omnes eius aduersariorum conatus concidant ac præcipua tela quibus Apostolicæ sedis gloriam & maiestatem attentant, velut à sole nebulæ dissipentur. At euulso hoc fundamento non modo Pauli primatus

corrūit, sed & suprema Petri autoritas ita eodem impetu concutitur, vt nemo post hac peritus ac prudens eā tuendam suscipere possit, si aduersarium nactus erit paulo solertiores qui ad erroris sui patrocinium subministrata sibi à Iesuitarum asseclis arma tractare norit : quandoquidem luce clarius est cauillationes omnes atque effugia, quibus perspicua, antiquitatis testimonia, quæ eadem prorsus Paulo ac Petro honoris insignia ascribunt, eluduntur, ad eadem pariter eludenda quæ eosdem titulos Petro tribuunt, conuerti posse : atque ita cassum & inane effici quicquid fere ex Antiquorum monumentis ad sancendam sedis Apostolicæ autoritatem depro-mi solet.

XXIII.

Hisc Notationibus confectis, Iesuitas Inquisitionis Decretum cum Parisiis spargendum curarunt insigniter adulterasse compertum est. Cum enim libri de Frequenti Cōmunionē propositionem quam tam atrocibus atq; horrendis conuitiis pulsarunt, ab eo intactam quod & supra annotauimus, adeoque illud nonnisi ad infranes eorum imperus demonstrandos accommodarum intelligerent, apertam ei falsitatem mendaci titulo Gallicæ interpretationi præfixo affingere non dubitarunt in hæc verba : *Decret de nostre tres-saint Pere le Pape Innocent X. par lequel cette proposition: S. Pierre & S. Paul sont deux Chefs de l'Eglise qui n'en font qu'un, est declarée heretique, & tous les Liures dans lesquels elle se trouue, sont deffendus.* Hoc est : *Decretum S. D. N. Innocenti Pape X. quo hac propositio: Petrus & Paulus sunt duo Ecclesia Principes, qui unicū efficiunt, hæretica declaratur, & libri omnes in quibus extat, prohibentur.* Quam audacissimam fallaciam in homines qui non omnem prorsus pudorem exuissent cadere posse vix credendum erat. Sola enim Decreti huius lectione meridiana luce clarius patet, propositionem illam per se & simpliciter non dam-

nari, sed solummodo, *ita explicatam, ut ponat omnimodam equalitatem inter S. Petrum & S. Paulum*: neque libros in quibus extat hæc propositio, damnari (quod indigno commēto ut librum de Frequenti Communionē prohibitum vulgo persuadeant, scribere audent) sed eos solum, *in quibus hæc propositio ut supra explicata & damnata asseritur & defenditur*. Hinc collige, quid aduersus absentes, tantoque locorum interuallo diffitos, & in ea quidem vrbe in qua multo magis quam in Gallia opibus & factione valent, moliantur: quibus fraudibus & præstigiis iudicum linguæ quâ libri conscripti sunt ignarorum, incertam aucupentur & ludant: cum etiam Parisiis tam pudendis manifestisque commentis veritatem circumscribant, cuius apertiores se hostes profiteri non possunt, quam cum eam istis tenebrarum ac falsitatis armis adoriuntur.

XXIV.

Tam insigni fallaciæ illud etiam plane nouum & inusitatum accessit, quod Decretum Illustrissimi Apostolici Nuntij nomine publicarunt. Apostolicos enim Nuntios vllam jurisdictionis partem, aut Decretorum suo nomine euulgandorum (quod ad jurisdictionem pertinet, & sine Ordinariorum juris imminutione fieri nequit) potestatem in Galliis obtinere inauditum plane est. Quare nouitatem illam Regij Priuilegij autoritate confirmatam incredibile videtur: nam quod huic Decreto præfixum est, ut pote mancum atque informe omni fide meritò caret, cum Regij Secretarij subscriptio ex solenni more necessaria desideretur.

FINIS.

M. DC. XLVII.